



雞卵糕

印象中的雞卵糕，總是軟軟甜甜，內底有誠濟我細漢甜蜜的記持。尤其以早較艱苦，囡仔人罕得咧過生日，上加是阿母焠一粒卵予阮食，就歡喜幾若工矣，若想欲食雞卵糕，實在愛家境袂糶才有法度。彼當陣厝裡頭喙濟，我是上細漢的查某囡仔，三个阿兄攏真勢讀冊，考試提頭名就親像桌頂拈柑，干焦我排袂著生相。不而過，阿爸佻阿母袂因為按呢就來罵我，嘛誠尊重我的興趣。

這馬認真想起來，以早逐年阮兜食雞卵糕，攏是佇我的生日。佇彼个重男輕女的時代，真正誠罕見。阿母講過伊足想欲生一个查某囡仔，尤其是生三兄的時，因為伊生做真古錐，兩蕊目睸足大蕊，胖奶胖奶，皮膚閣誠白，阿母佻阿爸攏講：「伊若是查某囡仔，毋知有佻好咧。」莫怪若拄著阿爸的同事，佢攏會講：「恁阿爸知影恁阿母生你的時，歡頭喜面，那唱歌那呼噓仔轉來看恁阿母佻你喔！」

細漢我較毋捌代誌，閣較愛變鬼變怪，齣頭有夠濟。真欣羨別人有雞卵糕通食，真正是會曉吵的囡仔才有糖仔通食，我生日彼工誠實食著雞卵糕，閣是上出名的臺中「神仙雞卵糕」。雞卵糕軟軟閣綿綿，彼種滿足的記持，到今攏印佇我的頭殼內。讀五專的時，時行的是冰淇淋雞卵糕，欲切的時猶閣有砢砢。佇春天後母面，天氣有淡薄仔冷的三月天，冰冰的雞卵糕，予阮那食雞卵糕若起畏寒，實在有夠特別。

結婚了後，阮兄弟姊妹做伙食雞卵糕，就是佇阿母的生日矣。阿兄攏會訂誠出名的雞卵糕，來祝福阿母生日快樂。

今年雖罔阿母破病，阿母的生日，阮猶是買阿母上佻意的雞卵糕。「阿母生日快樂！真感謝你辛苦晷養阮大漢。」阿母無法度講話，干焦目睸金金相，看阿母遮爾艱苦，彼塊細細塊的雞卵糕，煞予我頭一擺吞袂落喉。彼當陣，我才了解，原來以早的雞卵糕遐爾仔好食，毋是因為伊真出名，嘛毋是因為貴參參，是因為雞卵糕內底，充滿阿爸佻阿母對我的愛佻包容。

作者：田美瑜

☆詞彙學習☆

【桌頂拈柑】toh-tíng ni kam：用手指頭拈取桌上的橘子，比喻事情極其容易。

【胖奶】hàng-ling/hàng-ni：嬰兒肥。形容嬰兒長得白白嫩嫩。

【呼噓仔】khoo-si-á：吹口哨。

【變鬼變怪】pinn-kuí-pinn-kuài：搞鬼、耍花招、故弄玄虛。

【齣頭】tshut-thâu：把戲、花樣。

【畏寒】uì-kuânn：打冷顫。

【晷養】tshiânn-ióng：養育。